

0 10 20 30 40 50 60 70 80 90 100 110 120 130 140 150 160

4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

Kodak Color Control Patches

67897

國史教本

信 668.18
887

11920.3-1

1092

敘

幽室有求若無睹也炳燭而索之則明矣迷途未指奚所從也
 前車而導之則達矣又况得大力者高設庭燎廣置郵埃功用
 更超出尋常乎是故聖賢之學一人傳之未若眾人傳之眾人
 傳之未若引翼御世者率天下傳之同年當塗夏君弢甫輯明
 陶文憲公年譜其殆以此為求幽之燭指迷之車乎元至正十
 五年明太祖初渡江文憲公杖策軍門即本鄒嶧定於一之旨
 以獻言太祖納之歷十四年掃蕩羣雄北定中原遂一天下洪
 武元年授公江西行省參知政事勅書實以王業之由歸之於

陶三友年譜

字第 2177 號

陶王敬先生年譜

公而推本所學謂公秉道學之正則公之見知於太祖與太祖之取信於公者深相契以聖賢之學非漢唐佐命攀鱗附翼志在功名者所能及也余欲購公全集而迄弗獲道光丙午選太平府教授爲公桑梓之鄉訪進謁諸生亦鮮有藏本聞公祠堂藏貯一部未遇公裔末由假閱耿耿胸臆常以爲憾今年春訪弢甫於婺源學署竟五晨夕賞析弗倦旣乃出所輯年譜示余曰子爲我序之余受而卒讀見其參匯元明兩史太平府志暨公全集鉤稽排纂條分件繫朗如列眉瞭若指掌其自跋又以公識見謨畫求賢克己牧民之仁惠經國之制作一一標明公

之全體大用固已軒豁呈露余復何言無已則請以自跋中所云公所學以濂洛爲法以考亭爲宗以闢邪說衛正學爲己責而申言之蓋朱子之學集諸儒大成歿後紹其傳者閩浙江左居多兼以有元享國八十餘年用人惟崇蒙古色目抑南人在漢人之下各路州縣長官除授皆不得與諸儒抱經世之略而阨於時弗獲施大率絕意仕進著書明道育羣才於有用俟嘉會於方來逮明太祖應運而興若集慶陳先生靜誠處州劉先生伯溫婺州宋先生景濂吾徽朱先生楓林趙先生東山汪先生環谷繼公膺徵聘者或委贄而仕或修史而歸顯晦不同所

學皆宗朱子粹然一出於正相與佐助昌期然所以牖太祖天
衷俾以朱子之學風厲羣倫統壹庶類實公秉道學之正有以
見知而取信故其輔翼成化之功視勅書中所獎王業之由專
爲戡定計者尤深且遠

國朝陸清獻公謂有明洪永至成宏人心風俗淳厚樸茂遠軼
漢唐由於家無異師人無異學所致諒哉斯言歿甫著述甚夥
述朱質疑一書辨邪說於豪釐疑似之交闡正學於微茫斷絕
之會尤有功於朱子輯公年譜諄諄以所學之正大聲而疾呼
實與述朱質疑義旨互相表裏讀斯譜者感奮興起以公所學

爲學而觀於昭曠之原騁乎康莊之域是則公昌明正學之遺
澤亦歿甫表章正學之苦心也夫

咸豐四年孟夏海陽年愚弟楊大容頓首謹敘

明翰林學士當塗陶主敬先生年譜



同里後學夏忻輯

元仁宗皇慶元年 壬子 一歲

是年先生生於太平府城東南隅昭文坊之西按祝篁溪
 先生祠堂記云郡城東南隅昭文坊之西實公生長之地
 先生生年不可考據明史先生卒於洪武元年集首載國
 史云卒年五十九按至正二十四年二月授黃州府知府
 秋坐事謫知桐城冬召還集載黃岡寓稿在黃州作服藥詩云
 閱世五十三頗覺元氣壯鶴沙小紀謫桐城作讀易詩云靜觀

大易九六數忽覺行年五十三至正二十四年至洪武元年凡五年則先生卒時五十七國史誤多二年又書趙道昭擬挽自序後云至順初道昭自中山來姑孰余年未冠以五十九計之時年二十一不得云未冠以五十七計之時年十九與未冠合則先生卒時五十七無疑逆數之生於皇慶元年

皇慶二年 癸丑

二歲

延佑元年 甲寅

三歲

是年正月改元

延佑二年 乙卯

四歲

延佑三年 丙辰

五歲

延佑四年 丁巳

六歲

是年先生父文興公卒太平府志傳云六歲失怙

從何益甫先生名友聞發蒙集中有讀書日記于言鄉黨

異之見府志

按發蒙何年不可考始次于此先生幼時之師仍有勿齋

潘公見送教諭又府志云師李習兄弟博涉經史尤長於

易

延佑五年 戊午

七歲

延佑六年 己未

八歲

延佑七年 庚申

九歲

正月辛丑仁宗崩三月庚寅英宗即位十二月乙巳朔詔以明年為至治元年

是年先生祖父大宥公卒至正癸卯先生至武昌江行雜詠中有先祖生日詩云兒時拜舞祖庭前白髮烏紗一老仙四十四年蹤迹遠幼孫涉世亦華顛

英宗至治元年 辛酉

十歲

至治二年 壬戌

十一歲

至治三年 癸亥

十二歲

八月鐵失弒英宗迎泰定帝於北邊而立之詔以明年為泰定元年

泰定帝泰定元年 甲子

十三歲

泰定二年 乙丑

十四歲

泰定三年 丙寅

十五歲

泰定四年 丁卯

十六歲

集中喜秋雨詩自注云十六歲時見太平監郡馬公昂夫

承命面賦喜秋雨詩用七言律秋字韻

致和元年 文宗天麻元年 戊辰 十七歲

二月改元致和七月泰定帝崩九月文宗即位改元天麻

天麻二年 己巳 十八歲

至順元年 庚午 十九歲

五月改元

集中書趙道昭擬挽自序後云至順初趙君道昭來自中

山姑孰士夫延置泮北詠歸亭余年未冠

至順二年 辛未 二十歲

至順三年 壬申 二十一歲

八月文宗崩鄜王懿璘質班即位十一月鄜王薨

順帝元統元年 癸酉 二十二歲

六月順帝即位冬十月改元

元統二年 甲戌 二十三歲

是年先生館溧水藍溪嚴氏集中惜逝文云溧水藍溪嚴氏曩以禮致余處賓師之位識其先輩兄弟五人為忘年交既而茂叔君卒踰二載芳叔君卒余歸當塗又代嚴潛述父行狀云先考字茂叔元統甲戌十一月卒則是年館

於藍溪至元丙子始歸當塗也

至元元年 乙亥 二十四歲

十一月因星變改元 罷科舉

館藍溪嚴氏

至元二年 丙子 二十五歲

是年仍館藍溪嚴氏二月與嚴厚齋遊龍鳴山山在溧水亦名無想

山有記冬歸姑孰

至元三年 丁丑 二十六歲

至元四年 戊寅 二十七歲

至元五年 己卯 二十八歲

至元六年 庚辰 二十九歲

十二月詔復行科舉時科舉既廢用翰林學士承旨夔夔

言詔復行之

至正元年 辛巳 三十歲

正月己酉朔改元

是年先生訓導姑孰郡庠集中挽方君政詩序云至正初

予訓導姑孰郡庠青陽方君政來正學事遣其子若孫執

禮受業後予去職君亦攝教天門于湖考滿聽銓吏部余

適與計偕乙酉春遇君京城云云則設教訓庠爲時亦未久也

是年三月二日長子晟生先生甲辰自樅陽寄晟詩云今年二十四稼穡識艱難又有三月二日晟生朝賦詩

又按先生子長晟次昱集中有昱至樅陽詩云若兄能守舍此處暫堪畱又示晟詩云汝弟來傳說朝儀熟見聞宋濂喻夫人墓銘亦云子二晟昱明史以昱爲兄誤昱二月二十五日生朝見集中昱生朝詩其生年不可考又本傳載晟洪武中爲浙江按察使府志載昱知州謫戍甯遠放

還

秋應浙江行省鄉試落第集中題張源相辛巳試院唱和詩卷云我賦浙江徒手還丹桂可望不可攀

按元史選舉志鄉試八月二十日第一場二十三日第二場二十六日第三場漢人南人試三場蒙古色目人只試兩場第一場蒙古色目人經問五條大學論語孟子中庸內設問用朱氏章句集註其義理精明文詞典雅者爲中選漢人南人明經經疑二問大學論語孟子中庸內出題並用朱氏章句集註經義一道各治一經詩以朱氏爲主

尚書以蔡氏爲主周易以程氏朱氏爲主已上三經兼用古註疏春秋用三傳及胡氏傳禮記用古註疏限五百字以上不拘格律第二場蒙古色目人策一道以時務出題限五百字以上漢人南人古賦詔誥章表内科一道古賦詔誥用古體章表四六參用古體第三場漢人南人策一道經史時務內出題不矜詞藻惟務直述限一千字以上是年新復科舉稍變程式減蒙古色目人明經二條增本經義易漢南人第一場四書疑一道爲本經疑增第二場古賦外於詔誥章表內又科一道

至正二年 壬午

三十一歲

至正三年 癸未

三十二歲

至正四年 甲申

三十三歲

是年秋先生以易領浙江鄉薦

按元制鄉試天下取合格者三百人赴會試蒙古色目漢人南人各取合格七十五人中選者各給解據錄連取中科文行省移咨都省送禮部腹裏宣慰司及各路關中禮部監察御史廉訪司依上錄連科文申臺轉呈都省以憑

照勘

冬因黃河溢決曹濮充濟皆被災令民入粟補官以備賑濟當塗夏宏叔秦君用俱以貲入仕先生作序以勵其行

至正五年 乙酉 三十四歲

會試落第集中輓方君詩序云乙酉仲春遇君京城遍覽都市

按元制會試以二月初一日試第一場初三日第二場初五日第三場蒙古色目人漢南人試題與鄉試無異蒙古色目人作一榜漢人南人作一榜第一名賜進士及第從六品第二名以下至第二甲皆正七品第三甲以下皆正

八品

是年太平總管高子明改創郡庠先生作孔廟大成樂諸賦

至正六年 丙戌 三十五歲

至正七年 丁亥 三十六歲

至正八年 戊子 三十七歲

會試落第南歸夏抵當塗集中有至正戊子下第南歸與同貢黃仲珍雷景陽同舟詩又有五月旦日至瓜州懷同

貢諸友詩

秋設教郡庠冬奉檄赴金陵為明道書院山長迎母徐太夫人就養集中送豐叔良序云姑孰有訓導曰豐叔良至正戊子秋至姑孰時余同教四齋相驩無間冬余赴金陵又悼亡詩云檄作書院長金陵坐寒氈為我奉母來承顏意彌虔

案元制凡師儒之官命於朝廷者曰教授路府上中州置之命於禮部及行省及宣慰司者曰學正山長學錄教諭路州縣及書院置之舉人下第漢人南人年五十以上并兩舉不第者與教授以下與學正山長

是年溧陽田賦改輸宜興舊制輸龍灣廣運倉經宜興無錫崑山嘉定四州之境出海入江至丹徒歷金山及黃天蕩始達龍灣民力凋敝至是用御史言改輸宜興先生作集慶路達魯花赤善政記

至正九年 己丑 三十八歲

在金陵有長明道書院述寓諸作

至正十年 庚寅 三十九歲

在金陵有送李儀伯赴西臺序

至正十一年 辛卯 四十歲

是年考滿自金陵歸設教郡庠集中送采石山長濮友文序云至正己丑余客昇明年濮君來昇又明年余歸太平又送程子舟序云郡府聘爲泮齋之師適余歸自金陵同時分校

至正十二年 壬辰 四十一歲

是年春徐輝壽陷江西諸州郡郭子興因汝穎兵起亦拔濠州據之太平戒嚴秋鎮守太平路軍官閱兵於北郊先生有姑孰閱武記

冬十月溧水劇賊方揚等攻陷州城葉勝犯太平至葉家

橋脅從甚衆去郡城四十餘里監郡元振同知仲禮單騎入賊營降其渠魁五人東兵來歸者七千戶有奇先生作監郡珊竹元振招安記同知仲禮功績記

是年彭翼兵入繁昌監縣鐵仲賓前後十三捷民賴以安先生作繁昌縣監邑鐵仲賓功績記

至正十三年 癸巳 四十二歲

是年夏城北產瑞麥一莖兩歧先生作瑞麥記

秋奉檄赴姚江爲會稽高節書院山長有新用直學潘國寶以錢五百緡修贄禮先生拒不受因諷以買石甃道脩

院門土徑行者便焉

是年左丞阿爾溫沙參政恩甯普分省明州委進士董朝宗團結餘姚民兵先生有登舜江樓詩

至正十四年 甲午 四十三歲

是年在姚江

十一月以公委去職臘月望後至當塗集中高節書院紀畧云余始視事當癸巳九月二日甲午仲冬以公委去職

臘月望後至當塗

至正十五年

韓林兒龍鳳元年

乙未 四十四歲

是年夏六月明太祖自和州渡江至采石先生與耆儒李習率父老出迎上召陶李與語時事先生因獻言曰方今海內鼎沸豪傑竝爭攻城屠邑互相長雄然其志皆在子女玉帛取快一時非有撥亂救民之志將軍若能反羣雄之所為不殺人不虜掠不燒房屋首取金陵以圖王業願以身許之太祖曰諾克太平授先生太平興國翼元帥府令史見集首國史及行部侍郎劉辰國初事蹟

按明史太祖本紀克太平改路曰府置太平興國翼元帥府自領元帥事召陶安參幕府事考令史即幕府僚屬本

傳以此年授左司員外郎非也辨見後

又按明史太祖本從郭子興于濠至正十五年三月子興卒時劉福通迎立韓山童子林兒于亳國號宋建元龍鳳檄子興子天敘爲都元帥張天祐太祖爲左右副元帥太祖慨然曰大丈夫豈能受制于人耶然念林兒勢盛可倚藉乃用其年號以合軍中故吳元年以前皆用龍鳳紀年凡十二年及丙午林兒卒丁未始稱吳元年凡吳元年前諸令旨中所稱皇帝聖旨者林兒也吳王令旨者太祖也集首所載俱一一可考

至正十六年

龍鳳二年

丙申

四十五歲

是年春三月太祖克金陵諸將奉上爲吳國公以元御史臺爲公府置江南行中書省上兼總省事置僚佐

是年先生奉命使淮母徐太夫人卒于姑孰集中悼亡詩云江南開大閬幕下叨備員石城奏雄捷銜命使淮埏風塵塞道路百里如數千慈親念行子加殮煢氣纏煢煢奉湯藥深夜更煮餐心勞不可救痛絕鬱莫宣慎終禮必誠淺土封亦堅庶冀良人歸中心無悔愆則先生或聞訃奔喪或使回始聞喪也又宋濂喻夫人墓誌云姑徐氏卒先

生適以使事留淮

按先生使淮不知何事考明史張士誠自淮東陷平江轉掠浙西太祖既定集慶慮士誠強詒書士誠士誠不報然則先生使淮或即奉書貽士誠也

又按是年先生因四方兵亂移家金陵悼亡詩云移家指鳳臺華省初依蓮但言移家在母喪以後不言何年知新近稿中有寄從子詩云舊居數椽屋昔別今八霜其詩敘次作於癸卯仲冬以前逆數之知移家在此年也

至正十七年

龍鳳三年

丁酉

四十六歲

居母憂

至正十八年

龍鳳四年

戊戌

四十七歲

是年服闋授行省都事

見太平府志

尋遷左司員外郎進郎中

見本傳集首國史

按明史職官志行省都事正七品員外郎正六品郎中正五品集首載龍鳳四年十月付都事陶某劄一道則陞左司員外郎及郎中當在是年十月以後明史謂乙未即授員外郎丙申陞郎中國史又謂丙申七月陞員外郎皆非也惟郡志謂服闋授行省都事為得其實

至正十九年

龍鳳五年

己亥

四十八歲

是年秋九月太祖於建龍關儀鳳樓雜寫金陵山川六處命僚屬各賦絕句先生有詩

十一月壬寅胡大海克處州授孫炎總制命招劉基宋濂章溢葉琛等先生有送孫伯融赴括蒼詩又有寄劉伯温宋景濂二公詩云水溢中原又旱乾風塵從此浩漫漫東山好慰蒼生望南國那容皓髮安要整綱常崇黼黻還成文物萃衣冠聖賢事業平生志幽樂何須戀考槃其勸駕之意殷矣

至正二十年

龍鳳六年

庚子

四十九歲

是年二月二十七日太祖遊姑孰靈山無相庵先生與汪朝宗都諫王思文理問俱侍行有詩紀事

三月十七日太祖登忠勤樓幕佐文士皆在命各賦律詩一首先生有詩

閏五月陳友諒陷太平直犯龍江關太祖親督軍與戰於龍灣先生侍從軍中有龍灣舟師詩二首又自效詩云出入兵戎裏揮豪代執戈

六月徵劉基宋濂等既至築禮賢館以處之先生有喜伯

溫景濂輩至新京詩云束帛徵賢出礪阿來從明主定山河
攄才要濟邦家用為治當調鼎鼎和定見百年興禮樂
先從四海戢干戈當朝輔佐伴伊呂汗簡芳名耿不磨其
期望之意殷矣

太祖問先生四人者何如對曰臣謀略不如基學問不如
濂治民之才不如溢琛太祖多其能讓

見本傳

至正二十一年

龍鳳七年

辛丑

五十歲

案本集知新近稿中次韻劉彥炳典籤感秋詩第二首云
我本隱逸人手種籬菊黃養真亦好道忽已五十霜當作

於是年

至正二十二年

龍鳳八年

壬寅

五十一歲

是年二月降人蔣英殺金華守將胡大海郎中王愷死之
先生有哭胡通甫參政王用和郎中詩

處州降人李祐之聞變亦殺行樞密院判耿再成反都事
孫炎死之先生有哭孫伯融詩

四月辛丑黃河清六百餘里有誌喜詩

冬夫人喻氏卒案悼亡詩云何意壬寅冬瞑目在我先宋
濂喻夫人墓銘云夫人諱德常字可貞父汝政母梅氏子

二晟昱孫一壻壽四十七卒卒後十日權厝江甯縣陶家山之原洪武二年正月追封姑孰郡夫人

又先生繼室陳氏洪武二年亦封姑孰郡夫人集首載正月誥命一道太平府志云安殉子昱孫卯兒坐法徙軍陳氏以前子從戎叩闈泣奏帝爲泣然曰安乃大儒朕初渡江首與先後功在鼎彝今子孫殘落深可憫念時卯兒已故立赦昱歸養亦封姑孰郡夫人

至正二十三年

龍鳳九年

癸卯

五十二歲

是年四月陳友諒大舉兵圍洪都秋七月太祖自將救洪

都先閱兵龍江與友諒戰於鄱陽湖康郎山八月友諒中流矢死其子理奔武昌先生侍從軍中有龍江閱兵康郎山應制大明鏡歌鼓吹曲諸詩案先生龍江詩敘云癸卯七月閱兵龍江臣某忝侍從又鏡歌曲敘云某忝侍從親覩大戰於彭蠡湖明史夏煜傳謂太祖親征友諒儒臣惟劉基與煜侍鄱陽戰勝草檄賦詩想未見先生集故云然九月凱旋太祖還應天先生有奏凱詩按敘云八月虜酋中流矢斃於舟中降其衆五萬皆宥釋之奏凱而旋臣以交字爲職躬臨其盛用作凱歌爲獻

壬午九月十五日太祖復自將征陳理先生供職應天未行案

是年九月二十二日立冬先生立冬日詩云憶君親沐雨

愧我已重裘蓋指太祖征陳理言也

十一月十五日先生赴武昌有江行雜詠諸詩

十二月丙申朔太祖還應天先生留武昌未歸按江行詩

敘云癸卯仲冬望日登舟秦淮至武昌詩云行至二十日

始臨鸚鵡洲則先生嘉平五日始抵武昌太祖朔日還應

天先生未及見太祖也

至正三十四年龍鳳十年甲辰 五十三歲

是年春正月丙寅朔李善長徐達等奉太祖即吳王位建百官以李善長為右相國徐達為左相國先生有聞立中

書省命左右相國詩

二月乙未以武昌圍久不下太祖復親往視師督諸將擊

之陳理銜璧出降荆湖之地望風皆附思得重臣鎮黃州

遂授先生黃州府知府寬賦省徭民以樂業有黃岡寓稿

諸詩案集首載龍鳳十年二月授黃州府知府令旨一道

然則黃州之授即由武昌行在命之與

三月乙丑太祖還應天

先生長子晟至武昌省親有二月十六日喜晟至武昌詩

秋坐事謫知桐城有鶴沙小紀諸詩先生次子昱至樅陽

桐城舊縣省親有喜昱至樅陽詩又有寄示晟詩二首

十二月召還授饒州府知府案集首載龍鳳十年十二月

授饒州府知府令旨一道鶴沙小紀中有聞除代者及召

還詩

歲暮抵金陵有臘八日發樞城及入境詩

至正二十五年龍鳳十一年乙巳 五十四歲

是年之饒州任時方征伐急軍需先生勸諭其民皆樂

輸將而用不乏適陳友定兵攻城先生召吏民諭以順逆

嬰城固守援兵至敗去諸將欲盡戮民之從寇者先生不

可太祖賜詩褒美州民建生祠祀之見明史本傳及太平府志

按集首載太祖賜詩云匡廬岩穴甚濟濟水怪無端盈彭

蠡鱷魚因韓去徙洋陶安鄱陽卽一理又饒州府志云陶

某為知府招徠有方流亡四集民為之謠曰千里榛蕪侯

來之初萬姓耕闢侯去之日又曰湖水悠悠侯澤之流湖

水有塞我思侯德

至正二十六年龍鳳十二年丙午 五十五歲

是年入朝有重登鳳凰臺獻歌奉進詩

命復守饒州申請免其軍需逃民咸歸建大有倉三皇孔

子廟士民於學舍講堂東建生祠立石

見本傳及太平府志

十二月韓林兒卒詔以明年為吳元年

至正二十七年

吳元年

丁未

五十六歲

是年五月初置翰林院首召先生為學士集諸儒議禮命

先生為總裁官

見本傳

按職官志吳元年初置翰林院秩正三品設學士正三品

洪武十四年始定學士為正五品學士之職大政事大典

禮集諸儒會議則與諸司參決其可否又梁寅石門集有

八月上陶學士書其時寅被徵入禮局而先生為之總裁

也

按先生明初議禮略見于明史一百三十六卷傳贊曰明

初之議禮也宋濂方家居諸儀悉多陶安裁定大祀禮專

用安議其餘參彙諸說從其所長禘禘用詹同時享用朱

升釋奠耕藉用錢用壬五祀用崔亮朝會用劉基祝祭用

魏觀重禮用陶凱皆能援據經義酌古準今郁然成一代

休明之治所考明初以園丘方澤宗廟社稷朝日夕月先

農為大祀後又改先農中祀每歲大祀十有四正月上辛祈穀孟

冬大雩季秋大享冬至圜丘皆祭昊天上帝夏至方丘祭

皇地祇春分朝日于東郊秋分夕月于西郊四孟季冬享

太廟仲春仲秋上戊祭太社太稷是也又考明初祈穀大

享朝日夕月先農之禮俱未嘗舉行祈穀禮定于嘉靖十

十七年先農禮肇于洪武二年大雩亦無常儀或躬禱或

朝日夕月禮肇于洪武三年露禱或於奉天殿或遣官祭告無每歲大雩之制則先生

專議之大祀圜丘方澤宗廟社稷而已圜丘方澤用周禮

冬夏至分祭至洪武十年太祖感齋居陰雨覽京房災異

之說謂分祭天地情有未安命作大祀殿于南郊是歲冬

至以殿工未成乃合祀于奉天殿以後率以為常至嘉靖

於是天地之分祭變而合祭矣宗廟則立四親廟皇高祖

考廟號德祖皇曾祖考廟號懿祖皇祖考廟號熙祖皇考

廟號仁祖是明以德祖為始祖其廟與周之后稷同至世

宗嘉靖十年奉德祖于祫室則祖之不當祫者變而祫之

矣社稷則據古禮異壇同壇以句龍配社后稷配稷至洪

武九年太祖以太社太稷分祭配祀皆因前代制欲更建

之為一代之典禮部尚書張籌請合祀社稷罷句龍后稷

之配而易以仁祖以成一代之盛典

崔亮下附張籌傳云籌頗善附會初陶安

等定園丘方澤宗廟社稷諸儀行數年矣洪武九年籌為尚書乃更議合社稷為一壇罷句龍棄配位奉仁祖配享識者竊非之于是社稷異壇者變而同壇祖不配社者又變而

配社矣郁然一代休明之治不得與明為終始可勝慨哉

又是年冬十月先生為議律官明史刑法志曰明太祖平

武昌即議律令吳元年冬十月命左丞相李善長為律令

總裁官參知政事楊憲傅瓛御史中丞劉基翰林學士陶

安等二十人為議律官諭之曰法貴簡當使人易曉若條

緒繁多或一事兩端可輕可重吏得因緣為奸非法意也

夫網密則水無大魚法密則國無全民卿等悉心參究日

具刑名條目以上吾親酌議焉每御西樓召諸臣賜坐從

容講論律義十二月書成凡為令一百四十五條律二百

八十五條所按先生所脩者乃洪武元年以前之律後洪

武六年定律令憲綱七年又定大明律十六年又定例律

遞有增改而吳元年初次所議之律不可復見矣

又太祖本紀及選舉志載吳元年三月丁丑始設科取士

先生知新近稿中有與員外郎黃觀瀾李彥章試士西掖

詩云王業興家國人才薦廟堂風簷留晷刻冰鑑照豪芒

列坐清儀肅終篇耿論昌願言登用者一一是賢良疑吳
元年設科取士之初先生卽首膺衡文之任云

洪武元年 戊申

五十七歲

是年春正月乙亥朔太祖卽皇帝位定有天下之號曰明

建元洪武

辛巳

正月初七日

先生與中丞劉基言于上曰適聞倣元舊制

設中書令欲奏以太子爲之上曰取法於古必擇其善者
而從之苟爲不善而一槩是從將欲望治譬猶求登高岡
而卻步渡長江而廻楫豈能達哉且吾子年未長學未充

更事未多所宜尊禮師傅講習經傳博通古今識達機宜
他日軍國重務皆令啟聞何必效彼作中書令乎謂詹同
等曰朕今立東宮官取廷臣勲德老成兼其職老成舊人
動有典則若新進之賢者亦選擇參用夫舉賢任才立國
之本崇德尙齒尊賢之道輔導得賢人各盡職故連抱之
木必以授良匠萬金之璧不以付拙工同對曰陛下立法
垂憲之意實深遠矣於是以李善長等兼東宮官乃諭曰
昔周公教成王告以克詰戎兵召公教康王告以張皇六
師此居安慮危不忘武備蓋繼世之君生長富貴泥于安

佚軍旅之事多忽而不務一有緩急罔知所措二公所言

不可忘也

見集首國史

丁亥十三日上御東閣先生及中丞章溢等侍因論前代興

亡之事上曰喪亂之源由於驕佚大抵居高位者易驕處

佚樂者易侈驕則善言不入而過不聞侈則善道不立而

行不顧如此者未有不亡卿此論深有契于余心古者今

之鑑豈不信與

同上

上與羣臣論學術先生對曰道之不明邪說害之也上曰

邪說之害道由美味之悅口美色之眩目人鮮不為所惑

自非有豪傑之見不能決去之也戰國之時縱橫捭闔之

徒肆其邪說游說諸侯諸侯急于功利者多從其說往往

事未就而國隨以亡此誠何益夫邪說不去則正道不興

正道不興天下烏得而治安曰陛下所言深探其本上曰

仁義治天下之本也賈生論秦之亡不行仁義之過夫秦

襲戰國之餘弊又安得知此

同上

二月壬寅朔先生與中書省臣李善長傅瓛等進郊社宗

廟議其圜丘之議曰王者事天明事地察故冬至報天夏

至報地所以順陰陽之義也祭天于南郊之圜丘祭地于

北郊之方澤所以順陰陽之位也周禮大司樂冬至禮天神夏日至禮地祇禮曰享帝于郊祀社于國又曰郊所以明天道社所以明地道自秦立四時以祀白青黃赤四帝漢高祖復增北時兼祀黑帝至武帝有雍五時及渭陽五帝甘泉太乙之祠而昊天上帝之祭則未嘗舉行魏晉以後宗鄭元者以爲天有六名歲凡九祭宗王肅者以爲天體唯一安得有六一歲二祭安得有九雖因革不同大抵多參二家之說元始間王莽奏罷甘泉泰畤復長安南北郊以正月上辛若丁天子親合祀天地于南郊由漢歷唐千餘年間皆因之合祭宋元豐中議罷合祭紹聖政和間或分或合高宗南渡以後唯用合祭之禮元成宗始合祭天地五方帝已而立南郊專祀天泰定中又合祭文宗至順以下唯祀昊天上帝今當遵古制分祭天地於南北郊冬至則祀昊天上帝于圜丘以大明夜明星辰太歲從祀方丘之說曰三代祭地之禮見于經傳者夏以五月商以六月周人以夏日至禮之于澤中方丘蓋王者事天明事地察故冬至報天夏至報地所以順陰陽之義也祭天于南郊之圜丘祭地于北郊之方澤所以順陰陽之位也

然先王親地有社存焉禮曰享帝于郊祀社于國又曰郊所以明天道社所以神地道又曰郊社所以事上帝又曰明乎郊社之禮或以社對帝或以社對郊則祭社乃所以親地也書曰敢昭告于皇天后土左氏曰戴皇天履后土則古者亦名地祇爲后土矣曰地祇曰后土曰社皆祭地也此三代之正禮而釋經之正說自鄭元惑于緯書而謂夏至于方丘之上祭崑崙之祇七月于泰折之壇祭神州之祇析一事爲二事後世宗之一歲二祭自漢武用祀官寬舒議立后土祠于汾陰睢上禮如祀天而後世又宗之于

北郊之外仍祠后土元始間王莽奏罷甘泉泰畤復長安南北郊以正月上辛若丁天子親合祀天地于南郊而後世又因之多合祭焉皆非禮經之正義矣由漢歷唐千餘年間親祀北郊者惟魏文帝之太和周武帝之建德隋高祖之開皇唐元宗之開元四祭而已宋元豐中議專祭北郊故政和中專祭者凡四南渡以後則唯行攝祀而已元皇慶間議夏至專祭地未及施行今當以經爲正夏日至親祀皇地祇于方丘以五嶽五鎮四海四瀆從祀宗廟之說曰周制天子七廟而商書曰七世之廟可以觀德則知

天子七廟自古有之太祖百世不遷三昭三穆以世次比至親盡而遷此有天下之常禮若周文王武王雖親盡宜祧以其有功當宗故皆別立一廟謂之文世室武世室亦百世不遷漢每帝輒立一廟不序昭穆又有郡國廟及寢園廟光武中興于洛陽立高廟祀高祖及文武宣元五帝又于長安故高廟中祀成哀平三帝別立四親廟于南陽舂陵祀父南頓君以上四世至明帝遺詔藏主于光烈皇后更衣別室後帝相承皆藏于世祖之廟由是同堂異室之制至于元莫之改唐高祖尊高曾祖考立四廟于長安太宗議

立七廟虛太祖之室元宗勅制立九室祀八世文宗時禮官以景帝受封于唐高祖太宗勅業受命百代不遷親盡之主禮合祧遷至禘祫則合食如常其後以敬文武三宗爲一代故終唐之世常爲九世十一室宋自太祖追尊僖順翼宣四祖每遇禘則以昭穆相對而虛東向之位神宗奉僖祖爲太廟始祖至徽宗時增太廟爲十室而不祧者五宗崇甯中取王肅說謂二祧在七世之外乃建九廟高宗南渡祀九世至于甯宗始別建四祖殿而正太祖東向之位元世祖建宗廟于燕京以太祖居中爲不遷之祖至

泰定中為七世十室今請追尊高曾祖考四代各為一廟
 廟皆南向以四時孟月及歲除凡五享孟春特祭于太廟
 孟夏孟秋孟冬歲除則合祭于高祖廟社稷之說云周制
 小宗伯掌建國之神位右社稷左宗廟社稷之祀壇而不
 屋必受霜露風雨以達天地之氣禮志初帝命中書省翰林院議於社壇創屋備風雨學士陶安言天子大社必受風雨霜露亡國之社則屋之不受天陽也建屋非宜若遇風雨則請于齋宮望祭
 上從起大事動大眾必先告于社而後出其禮可謂重矣
 蓋天子社以祭五土之祇稷以祭五穀之神其制在中門
 之外外門之內尊而親之與先祖等人非土不立非穀不

食以其同功均利以養人故祭社必及稷所以為天下祈
 福報功之道也然天子有三社為羣姓而立者曰大社其
 自為立者曰王社有所為勝國之社屋之不受天陽國雖
 亡而存之以重神也後世天子之禮惟立大社大稷以祀
 之社皆配以句龍稷皆配以周棄漢因高祖除亡秦社稷
 立官大社大稷一歲各再祀光武立大社大稷于雒陽在
 宗廟之右春秋二月及臘一歲三祀唐因隋制並建社稷
 為大祀仍以四時致祭宋制每歲以春秋二仲月及臘日
 祭之元世祖營社稷于和義門內少南以春秋二仲月上

戊日致祭今宜祀以春秋二仲月上戊日皆從之

見集首國史

按國史于園丘方澤宗廟社稷諸議下皆以云云二字總

括大義恭讀

欽定四庫全書簡明目錄云明初典禮皆安議定其文不載集

中集所載者送別序引居其半安學術深醇所作皆平實

典雅固一代開國之音也是先生著作莫大于議禮諸篇

今悉從明史禮志全載以補文集之闕云

四月命知制誥兼脩國史

見本傳

集首載勅旨一道云蓋聞

國家之立也必有一心之臣尊戴匡輔用能張其綱紀植

其表儀正其位名善其詞命基圖以大自然朕之初

渡江也江南之士杖策謁于軍門者陶安實先卽以帝王

事功期于始見之際贊襄兵務多歷年所宣號令則軍民

信議禮刑則體要成建陳之論以忠出納之命惟允雖艱

難繁劇一不以動其中眞爲一心者焉至于牧民而民安

治吏而吏服捍城禦侮寇慙成擒列郡晏甯其勞則著肆

朕君臨大寶念此翊運舊臣老當優之不欲久煩以政茲

者開翰苑以崇文治立學士以冠儒英重道尊賢宜爾爲

長尙其論思以盡已獻納以告君綜理人文明揚世教副

余眷注以臻治平可翰林學士嘉議大夫

按明制正三品初授嘉議大夫

陞授通議大夫加授正議大夫

知制誥兼脩國史宜令陶安准此洪武元

年四月日

按明史職官志學士之職誥勅以學士一人兼領凡纂脩實錄玉牒史志諸書皆奉勅而統承之是知制誥及脩國史乃學士本職吳元年召先生為翰林學士與諸儒議禮定律此勅命所謂議禮刑則體要成是也今禮律奏進以後又命之知制誥兼脩國史以皆學士本職故統學士命之與

御製門帖子賜之曰國朝謀略無雙士翰院文章第一家

時人榮之

見本傳及集首國史

按本傳列御賜門帖子于吳元年國史列于命知制誥之下今依國史

是月授江西等處行中書省參知政事集首載勅命一道曰於戲水之有源事乃有因朕之王業孰知其由乎惟朕有臣前翰林學士陶安幼而志於學長而明道未能施用因天下亂朕自西渡江東來時安率父老迓朕駐姑孰首言曰方今海內鼎沸羣雄奮爭不過子女玉帛耳非民之

父母也將軍至此有何道哉朕曰爾所言者何也安曰願將軍反他雄之所為操王業之度招賢納士首取金陵駐蹕于此以安天下安願以身許之朕遂諾不數年間大江之南盡為我定初安厯案牘後守鄱陽鄱陽之民果勁而頑及安至賊乃叩城安與守將謀禦之頃而縛賊賊乃息撫之以風化山民遂無亂者於戲水之源事之因王業之由惟安之謂乎至建國紀元之初詔入京師授以翰林學士今兵入中原得山東是年二月十二日癸丑常遇春克東昌山東平朕欲少健者開省山東經理諸事以南昌郡西省參政汪廣洋者其

人不貪而純粹可職山東惟安有道可署西省以代廣洋者詔卿速行導吾民以良於戲惟天生賢為國民寶安秉道學之正以誠格天慎之戒之可中奉大夫明制正二品初授中奉大夫陞授通奉大夫加授正奉大夫江西等處行中書省參知政事宜令陶安准此洪武元年四月日

按明史職官志初太祖下集慶自領江南行中書省戊戌置中書分省于婺州後每畧定地方即置行省其官自平章政事以下大略與中書省同設行省平章政事從一品左右丞正二品參知政事從二品洪武九年改諸行省俱

爲承宣布政使司罷平章政事左右丞等官改參知政事
爲布政使秩正二品考先生參知政事時實從二品非正
二品而封中奉大夫者太祖特以優先生非常例也又按
此勅當在翰林學士勅後集首列學士勅之前非也
又按集首所載翰林學士及江西參政勅命二道敘太祖
與先生遇合原委詳細親切雖未必太祖親製亦非詞臣
所能代爲必經太祖面命而復加以裁定者也後世于明
祖儒臣皆屈指劉伯溫宋景濂二公而不知先生契合之
深實在二公之首今悉錄入以備明初文獻之徵云

九月癸卯

是月戊戌朔
癸卯初六日

先生卒于任所疾劇上時務十二

事

國史作
十事

上甚哀悼親爲文遣官祭之追封始孰郡公

見本

傳及太
平府志

又集首載御撰祭文一道曰皇帝遣江西有司致

祭于故中奉大夫江西等處行中書省參知政事陶安之
靈朕念爾生長姑孰秉性聰明習先聖之道所目皆通當
胡元科舉之時惟爾適中鄉選出羣儒之上使閭里增輝
爾祖宗亦陰悅奈胡元疑吾漢南雖有道之士不居要職
俄遇朕渡江慨然相副于今十有四年曾負勤勞今年授
爾西省參知政事朕思當此英雄展志之秋文章光耀之

際其闡聖賢之學正在今日奈何天不假年如水之東逝使朕歔歔而淚襟者何也蓋不忘同患難以至于今故耳特令有司列牲祭之明文以諭靈之不昧尙享洪武元年九月日

按太祖功臣親爲文祭者武臣李文忠文臣章溢及先生外不多見至祭先生文一則曰習先聖之道再則曰闡聖賢之學非太祖知先生所學之醇不能爲此言也府志云祭文無考想纂志者未見先生集故云然

又先生官雖至江西行省參政然爲時未久卽卒惟爲學士時總裁禮局明初大禮悉定于先生一人之手故其官最著宏治間刻集稱陶學士集從其重者稱之也又先生實未賜諡至福王南渡後始追諡文憲不足爲重近同鄉張氏奉陶雲汀中丞之命重刻斯集改題曰陶文憲公集似不如舊題爲得其實附識於此

右鄉先儒陶主敬先生年譜所比次全集參考元明二史而輯之者也繕寫畢謹濡筆而識其末曰從來開國翊運之臣才畧雖邁等夷往往權謀機變譎不勝正求其以道德爲輔翼以學問爲經濟開創草昧弼成丕基三代而下

不多觀也先生生於元末擾攘之秋兵革不休豪傑竝起明太祖初克太平先生識爲真主慨然以身許之其高見卓識有如此者首謁軍門敷陳王道以不嗜殺爲得民之本以取集慶爲首善之地三百年基業定於數語之中其訐謨碩畫有如此者當太祖起兵之初攻城陷陣皆一時梟勇之將儒臣從渡江者若楊元杲阮宏道李孟庚侯元善樊景昭輩又非王佐之才其時劉伯溫宋景濂諸老伏處浙東隱而不出先生遠道貽詩勸懇勸駕其後雲集帝畿卒成王業史以徵聘屬之孫炎推薦屬之李善長而不

知先生起蟄之功尤不可沒其求賢爲國有如此者羣賢旣至築禮賢館以待之太祖嘗從容質問先生對以謀畧不如劉基學問不如宋濂治民之才不如章溢葉琛休休有容不矜不伐其克己好善有如此者歷守黃饒二州披草萊闢荆棘寬刑薄賦以與民休息友定之變全活無算其仁恩惠政有如此者建國紀元之初召入京師授以翰林學士時太祖銳意典禮宋景濂方家居明初諸禮悉先生裁定參集衆議各從其長給祿用詹同時享用朱升釋奠耕藉用錢用壬五祀用崔亮朝會用劉基而大祀悉先

生一人專議郊祀禮歷代合祭之喪社則力

主不屋以禮自來大祀之禮未有如明

初之善者也其制作宏偉有如此者推其源流遠有端緒
蓋先生之爲學也以濂洛爲法以考亭爲宗以闢邪說衛
正道爲己責其教人也以朱子讀書法爲主以程畏齋分
年日程爲式以呂舍人約爲準繩見人談陸學必正色拒
之於經無所不通而尤精於詩易守朱子本義詩則貫
穿小序兼明古韻而悟吳才老協韻之非觀先生學詩詩
云古韻自諧何用協可見焦弱侯陳季立古無協韻之說

先生早開之於三百年之前矣蓋其道德醇厚故輔治無
雜霸之謀其學問該博故議禮無偏頗之迹至於發爲詩
文淵源洛閩吞吐韓歐忠君愛國之忱救時恤民之志時
時流露於楮墨之間又所謂有德者必有言也嗚呼我當
塗自建縣以來道德功業文章一人而已矣先生歿後二
子以官獲罪發家屬爲軍後嗣零落全集刻於宏治間無
再鈔者姑孰爲先生桑梓之鄉世家舊族亦鮮有藏本惟
先生祠堂中一部歸然獨存 尤君子與所宦遊四方先
後購得兩部懼其愈不可 稽會萃作爲此

譜聊存先生平生之卷

所識

光緒十年仲秋同里後學夏



